


# ESCRITURO

L'escrivan marsihés Glàudi Barsotti guierdouna dóu Grand Prèmi Literàri de Prouvènço.



# Prouvènço d'aro

Tóuti li mes, lou journau de la Prouvènço d'aro

Nouvèmbe 2014

n° 304

2,10 €

## Alarmo ensinamen

La lengo d'oc perd aro la pousibleta d'avé un avenidou.

La situacioun es gravissimo e voulèn alerta lou mounde qu'es pas toujour bèn enfourma di afaire de l'ensinamen.

Devèn agacha claramen la situacioun : l'ensinamen de la lengo es en perdicioun au segoundàri, en fracas assoulu au licèu. Lis efeitiéu ié soun à la rouino.

En Lengadò li que soun councerni pèr quicon d'òcitan soun passa en un an de 468 à 307 ! Es-à-dire un centenat de licean pèr nivèu pèr 4 despartamen d'oc de la regioun.

En Aquitàni pèr 5 despartamen n'en soun à 244.

Pèr Miejour-Pirenèu es un pau miés : pèr 8 despartamen n'en soun à n-un chic mai de 1300 emé 200 dins lou privat. Dins aquesto regioun benesido, coume dins lis àutri, vesèn dins lou public uno evapouracioun dis efeitiéu dóu coulège au licèu em'uno baïssò de 10 à 1. Curiousamen la baïssò es bèn mens forto dins lou privat d'aquesto regioun que ié passon de 333 à 203.

Pèr Prouvènço la situacioun es proun maridasso tambèn au segoundàri coume lou moustrè lou darnié counsèu acadèmic. Acò pèr lou quantitatiéu, mai es pas miés pèr lou qualitatiéu.

**Poudèn encaro parla d'ensinamen au segoundàri e particulieramen au licèu ?**

La grandò majourita de ço que se ié fai, se debano dins lou tèms que ié disèn peri-escoulàri fa pèr de prouffessor titulàri que n'en soun proun descoura.

S'agis en majourita d'òupcioun facultativo emé tóuti li nivèu mescla.

Dins l'Òcitanio, tout lou sistèmo educatiéu sort pas proun de jouine fourma e bilengue au nivèu bac.

**Ounte nous meno tout acò ?**

La rouino dóu licèu es la capitado d'uno estratègio que lancè la lèi Fillon en 2005. Fillon es un enemi declara di lengo regiounalo e soun idèio èro bèn de trenca la cadeno de soun ensinamen pèr l'arrouina coumpletamen.

Se lou segoundàri e d'en premié lou licèu s'estanco, i'aura pas de mounde pèr ana à la faculta e dóu cop pas mai de jouve fourma pèr faire de regènt dins lis escolo que se van arresta sènso que siegue necite de lis ataca direitamen.

La lèi Fillon es de 2005. Metegué de tèms pèr se lança e pourta frucho amaro, mai aro ié sian en plen, e n'en vesèn li counsequènci : rouino au licèu e lou superior en grand peril. l'a de mens en mens de faculta que fan de licènci d'oc e lis efeitiéu d'aquéli que demoron soun mai que meigrinèu em'uno proupourcioun proun bello de retirat : acò fai que lou pesquié de jouine es bèn redu.

Mesuran déjà despièi 3-4 an coume es difficile de trouba de jouine en capacita de se fourma au mestié.

(seguido pajo 2)

## La poulido voues de Carla



## Festenau de tiatre prouvençau à Sorgo

Es à Sorgo (en Vaucluso) que se tendra lou *Festenau de tiatre amateur en prouvençau*.

Aquéu festenau es ourganisa pèr la chourmo "Li Jougaire prouvençau" beilejado pèr Dono Crestiano Roche. Se debanara dóu dilun 24 au dimenche 30 de novèmbre au Théâtre de l'Astrolabe à Sorgo (3 carriero de l'Armée des Alpes).

- Dilun 24 à 6 ouro e miejo i'aura presentacioun di chourmo

de tiatre e aperitiéu d'ounour en presènci dóu Segne conse.

- Dimars, dimècre, dijòu e divèndre en vesprado, à 8 ouro e miejo, i'aura de representacioun tiatralo emé la participacioun de: *lou group Pactys; la chourmo dis afouga de Perno li font, li galejaire dóu Tor; li jougaire de Sorgo; Renaissance de Vedenò*.

- Dissate 29 à 5 ouro sara lou group prouvençau *Parlaren de Bedarrido*, pièi lengo e tiatre de

Lambesc; en vesprado à 8 ouro e



miejo lis Estubassa de Vielo - Dimenche 30 à 5 ouro sara lou pountin pantaious de Mountèu que mountara... sus lou pountin. En tout saran 14 pèço de tiatre que se jougaran pèr l'encantamen dóu public e soun divertimen, perqué, parai, se plourara pas à n-aquéu festenau, senou de rire!

Intrado generalo : 6 eurò. Reservacioun e entre-signe : Théâtre de l'Astrolabe : 04 90 39 66 59 - espaceprojecteurs@sfr.fr

### Carla de Gravesoun

La voues meravihouso de la jouino gravesounenco a treboula la jurado...

Pajo 3

### Prèmi de la vouacioun

L'escolo Frederi Mistral de Maiano es estado recompendado dóu Prèmi...

Pajo 5

### Lou Forum d'oc à La Faro

La situacioun de nosto lengo es estado eisaminado pèr n'en tira d'ensinamen...

Pajo 12